

3. LANTOKIA EDO ESKOLA

AZTERTZEKO ARLOA

Ordu asko ematen ditugu gehienok lantokian edo ikasten (batxilergoan, unibertsitatean, lanbide heziketan...). Zein da lankideekin edo ikaskideekin erabiltzen dugun hizkuntza? Erdaraz aritzen garen kasuetan, zergatik jotzen dugu erdarara?

Lanean erdaraz egin behar ditugun kontuak (idatziak, fakturak, txostenak, gutunak, eskaerak...) euskaraz egin daitezke? Saiatu gara inoiz laneko ohituretan eragiten? Langile soilak baldin bagara, badugu aukerarik arduradunengan eragiteko gaiaz hausnartu dezaten? Arduradunak baldin bagara, hizkuntza ohiturak aldatzeko erabakirik hartu dezakegu?



ISPILUARI BEGIRA

ESKOLAN: Irakasleen zein ikasleen HIZKUNTZA OHITURAK.

Gaur egun udalerrri euskaldunetan ikasle guztiak dute euskara hutsean jarduteko aukera. Zein da, ordea, ikasleen arteko hizkuntza? Eta irakasleen artekoa?

GALDERAK:

- > Zein da ikaskideen arteko hizkuntza? Euskaraz aritzen al gara ikasle on artean?
- > Euskara eskolako hizkuntza arautua soilik da, ala kaleko eta ikaskideen arteko hizkuntza naturala?
- > Irakasleen artean, euskaraz aritzen al gara? Irakasleak aurrean daudenean aldatzen al ditugu hizkuntza ohiturak?
- > Irakasleok ba al dugu hizkuntzaren transmisioan dugun arduraren kontzientziarik? Ala ikasgai zehatzen ardura hutsa daukagu?
- > Zein da patioko edo aisialdi orduetako hizkuntza nagusia?
- > Ba da hizkuntza ohituretan eragiten duen erreferente nabarmenik irakasleen edota ikasleen artean?
- > Lanbide heziketako ikasleen edo irakasleen kasuan, aldatzen al dira hizkuntza ohiturak?

LANEAN: Lankideen arteko HIZKUNTZA OHITURAK, LANTOKIKO HIZKUNTZA PAISAIA, Lan HIZKUNTZA...

Lantokian, lankideen arteko hizkuntza ohiturak zein diren, gailentzen den hizkuntza zein den, eta lanean zein hizkuntzatan aritzen garen aztertu daiteke. Zein da hizkuntza bat ala bestea erabiltzearen arrazoa? Lanarekin lotutako hizkuntza, arau soziala, ohitura zehatzak. Aztertu eta eragin.

GALDERAK:

- > Zein da lankideen arteko hizkuntza laneko ohiko jardunean? Lankideekin, atsedean tartetean, hizkuntza aldaketarik ba al da?
- > Gutunak, idatziak, posta elektronikoak, fakturak eta antzekoak, euskaraz idazten al ditugu lanean? Horrela ez bada, ba al dago aukerarik hizkuntza ohiturak aldatzeko?
- > Langile soil bezala, eragin al dezaket hizkuntza aldatzeko alorren batean? Arduradun gisara, hartu al dezaket laneko hizkuntza aldatzeko erabakirik?
- > Lantokiko hizkuntza paisaia nolakoa da? Euskara gailentzen al da?



ERAGIN BURUARI

Lantokian

- Lankideen artean eragiten al du gure jarrerak hizkuntza bat ala beste hautatzeko orduan?
- Zein hizkuntzatan aritzen gara posta elektronikoak, gutunak, eskaerak eta antzekoak idazterakoan? Euskaraz egin al daitezke horiek?
- Erabaki pertsonalak hartu al ditzakegu lankideen edo laneko hizkuntza ohiturak aldatzeko edota euskararen aldekoak izateko?
- Fakturak, menuak, hornitzaileekiko harremana, eskaintzak, eskaerak eta antzeko guztiak zein hizkuntzatan egiten ditugu?

Eskolan

- Ikasleen artean, zein da ohiko hizkuntza?
- Euskara eskolarekin eta hezkuntza arautuarekin estuki lotuta dagoen hizkuntza da, ala kaleko eta herriko hizkuntza naturala da zuretzat?
- Irakasleen artean, zein da ohiko hizkuntza?
- Ikasleen aurrean berariaz eta kontzientziaz aritzen dira irakasleak euskaraz, ala berezko hizkuntza naturala da irakasleen artean?

ALORRA:

LANTOKIA edo ESKOLA

HELBURUA:

Lankide edo ikaskideekin nola aritzen garen aztertzea, eta behar balitz hizkuntza ohiturak aldatzea.

AZTERGAIAK:

Ikaskideekin edo lankideekin ditugun hizkuntza ohiturak.

Eremua: eskola edo lantokia.

ARDURA:

Oro har, pertsonala.

URRATSAK:

· Hizkuntza ohituretan eragiteko, euskarari eusteko konpromisoa.

*Ardura handiko lana
da nire ustez daukaguna,
irakaslea ez baita
ikaslearen laguna.
Honetara iristeko
nor izan da erruduna?
Ikastolan falta bada
kontzientzi euskalduna
hemen egin behar dugu
geuk egin dezakeguna.
Buenos dias-ka ezin da
hasi guretzat eguna
eta nolakoa izango da
gure etorkizuna
haurrei eskatuz gero
geuk egiten ez duguna.*

Aitor Sarriegi, 2017ko
Bertsolari Txapelketa
Nagusiko finalean



I+D
IDELAK

- Lankideen edo ikaskideen artean euskarari eusteko eta ahobizi izateko konpromiso zehatza hartu.

- Konpromisoari eta erabakiari buruz hitz egin lantokian edo eskolan, lankideak eta ikaskideak ere hizkuntza ohiturak aldatzera gonbidatuz, behar den kasuetan.

- Euskaraz bizitzea hautatu duten herritarren hitzaldiak edo antzekoak antolatu, argudioak jendarteratzeko.
